

ADVIS

SALVTAIRE

POVR LE TEMPS

PRESENT,

Sur le sujet du mot de Mazarinistes.



A PARIS,

Chez la Veuve THEOD. PEPINGVE', & Est.  
MAUCROY, rue de la Harpe, vis à vis  
la rue des Mathurins.

---

M. DC. XLIX.

56



ADVIS

SALVATAIRE

POUR LE TEMPS

PRESENT.

Sur le sujet du mot de Mazarin.



A PARIS.

Chez la Veuve THROD. PERINON, & Est.  
MAYEY, rue de la Harpe, vis à vis  
la rue des Mathurins.

---

M. DC. XLIX.



# ADVIS

## SALVTAIRE

### POVR LE TEMPS

present.

*Sur le sujet du mot de Mazarinistes.*

**M**'Estant trouué il n'y a que deux iours dans vn tres-grand peril de ma vie, duquel i'eschapay plustost par ma bonne fortune que par ma conduite, i'ay bien voulu vous faire sçauoir comme ie faillis a estre massacré, ou ietté dans la riuiere par l'imprudence d'un gredin du Pont neuf, lequel m'ayant oüy dire vne parole d'equiuoque, l'interpreta en vn sens tout contraire au mien, & tira vne consequence par la fallace d'amphibologie, qui me pensa perdresans ressource. Il est arriué aussi à d'autres personnes qui sont mes voisins vn pareil accident: & parce qu'il vous en pourroit arriuer le mesme, i'ay iugé estre obligé de vous en aduertir par le recit de mon histoire.

Platon, ce diuin Philosophe, dit que pour bien entendre l'essence des choses, il faut esplucher avec soin l'ethimologie de leurs noms. Les Pythagoriciens leur donnent de grands auantages. Il y a vne Secte de Philosophes dans l'Escole qui les met pour objet aux Sciences, & sont appelez pour cette cause nominaux. Et les Rabins sont si scrupuleux touchant les noms des choses, que dans des lettres mesmes, & dans le moindre petit point ils en tirent de grands mysteres. Je ne fais point estat de tout cela, & me



suis toujours mocqué de ceux qui se fient à des caractères. Neantmoins ie vous diray franchement que depuis deux iours en ç'a quand i'entends prononcer le mot de *Mazariniste*, ie tremble d'apprehension, parce que sans iamaïs l'auoir esté, ny mesme eu le moindre dessein de le deuenir, au contraire ayant pris les armes contre ce party, ie faillis à estre tué pour auoir esté appelé Mazariniste.

On ne scauroit auoir assez d'amis, & qui a vn seul ennemy en a trop, mesmement dans vne guerre ciuile, comme celle où nous sommes: car si vne personne vous veut du mal, & qu'il vous rencontre dans quelque assemblée, où il y en a toujours de mutins & de seditieux, ausquels les mains demangent qu'ils ne fassent du mal: si dis-je cet ennemy vous veut perdre, il n'a qu'à lascher vne parole, & chucheter à l'oreille de quelqu'un, qu'il reconnoistra le plus porté pour son party, disant que cet homme est vn traistre, ou du party contraire; en voila assez pour vous perdre dans vne sedition, tous ceux qui ont dequoy sont estimez coupables: & alors se verifie le dire de cet Ancien, que c'est vn crime à tous les hommes d'auoir la fortune pour ennemie, *grande mortalium scelus, fors inimica*. Ie me croyois asseuré de tous ces costez là; car graces à Dieu, ie ne sçache aucun homme qui me vueille du mal, & de se faire mon ennemy pour auoir mon bien, ie deffie qui que ce soit, car ie n'en ay point. Mais qui peut esuiter tous les coups de la mauuaise fortune, quelque folle & capricieuse qu'elle soit, elle n'est que trop ingenieuse pour nous perdre, & ne croid point se raualer quand elle s'ataque aux plus petits, aussi bien qu'elle ne craint point, & n'a nul respect pour les grands.

Ie fus Ieudy passé sur les deux heures apres midy me diuertir sur le Pont-neuf, à dessein d'apprendre des nouvelles, ie m'arrestay par malheur à vn vieux borgne qui en disoit à ceux qui se trouuerent à l'entour de luy.

Il estoit sur le discours de la chereté des viures, & disoit qu'il falloit auoir esté au siege de la Rochelle comme luy, pour scauoir que les œufs s'y vendoient vingt sols la piece, & autant



& autant vne petite chandelle de suif, & que pour les viandes ordinaires elles estoient hors de prix. Je n'estois point de dans, dit-il, mais dehors employé dans l'artillerie, i'y perdis vn œil, & suis demeuré tel comme vous me voyez. Vous devez, dis-je, tirer de la gloire de vostre infortune, & ce défaut de visage est réparé par les marques de vostre courage. Ce ne fut pas en combattant, dit-il, que ie receus le coup, mais en rendant quelque service pour le canon : i'ay eu du depuis, dit-il, ma reuanche, car estans entrez dans la ville, ie battis tant vn Huguenot qui ne vouloit point m'ayder à dresser vn reposoir pour la procession, que ie croyois l'auoir affommé. Vrayement, dis-je, vous deuez traiter autrement ce pauvre diable, qui estoit assez matté du ieusne qu'il auoit fait depuis si long-temps, quoy que *hoc genus demoniorum non ejicitur neque ieiunio & oratione*. Il repliqua que cet Huguenot deuoit faire le commandement du Roy : Il est vray, dis-je, qu'il faut obeir au Roy, i'ay leu neantmoins dans le Theologien Politique ( qui a esté imprimé avec permission ) qu'il n'est pas permis aux Roys de faire ny commander tout ce qu'ils veulent, mais seulement tout ce qui est iuste. Que si les Roys contreuient à ce qu'ils sont obligez de faire pour leurs sujets, il est sans doute permis aux sujets par vne equité relative de ne leur rendre pas l'obeyssance iniuste qu'ils exigent par cruauté plustost que par iuste douceur. La guerre, dis-je apres, que nous faisons pourroit bien estre contre le Roy, ou plustost contre vn Tyran, qui a vsurpé l'autorité Royale.

Il ne faut point semer des marguerites deuant des porceaux. Ces rustres qui m'escoutoient recueillirent de tout mon discours vne conclusion tout à fait contraire aux premieres, & l'vn deux commença à esleuer sa voix, & dire: Voila vn *Mazariniste*. A ce mot ie fus tout saisi d'abord, & demeuray quelque temps tout confus, puis me mis en colere: mais tant plus ie me voulois iustifier, premierement avec douces paroles, puis par des raisons plus fortes: & à la fin, comme ie vis que ie ne gaignois rien, ie voulus vser de protestations, auxquelles i'adjoustay des menaces.



Nostre entendement, dit Aristote, est vne table d'attente, vne cire vierge, mais la premiere impression y demeure, & ne s'efface pas avec autant de facilité, comme elle y est empreinte. Quand nous sommes preuenus de la bonne ou mauuaise estime de quelqu'un, il à beau faire pour nous dissuader, nous nous rendons au premier qui se presente pour nous sômer, & qui nous sollicite de la part de la verité, ou vray-semblance: & s'estant rendu le maistre il bastit dans nostre entendemēt vn fort d'erreur & d'opiniaistreté, duquel il ne se retire qu'à toute force. Celuy qui est accusé, quelque innocēt qu'il soit, à bien de la peine de se iustifier, & bien qu'il fasse voir son innocence, il demeure tousiours dans l'esprit des Iuges, ou de ceux qui ont oüy ses accusations quelque soubçon, & apres s'estre lauē, il reste tousiours quelque petite tache d'infamie.

Je ne fus pas plustost appellé *Mazariniste* par ce coquin, que tous ceux qui l'oüirent jetterent les yeux sur moy pour me regarder, & comme nous croyons plustost le mal que le bien, chacun deslors conçut vne idée de moy dans son esprit, qui me representoit (comme certains miroirs qui font voir les choses à l'enuers) tout autre que ien'estois pas.

Je ne suis point *Mazariniste*, disois-je, i'ay pris les armes, & ay mesme combattu contre ceux de son party, cependant me voila inuesty de toutes parts, ie suis vn Cavalier, dis-je, qu'on vienne avec moy à la Maison de Ville, ie vous feray voir, qui ie suis. Cavalier, dit vn, où sont tes esperons. I'en ay des beaux & bons à vostre seruice, dis-je, ie n'auois pas encore beaucoup de peur, Si mes Camarades estoient icy, vous ne me traicteriez pas de la sorte. A ces mots vn des plus hardis me vint pouffer, en disant, qu'on ne deuoit point souffrir qu'un *Mazariniste* parlaist de la sorte, & qu'il estoit luy seul assez pour moy & mes Camarades. Voila le bruit qui augmente, cette troupe grossit, & comme vne petite estincelle peut causer vne grande incendie, si on ne l'esteint promptement, ie taf. hé de m'esquiuier le plus doucement que ie peus: on me laisse aller, ie fais quelques démarches sans tesmoi-



gner aucune crainte : mais ie ne fus pas à dix ou douze pas du lieu de mon depart, que me voila suiuy & poursuiuy d'un nouveau aduersaire, qui portoit vne espée, lequel me traitta plus rudement que tous les autres ; car sans auoir esgard à mes protestations, il me lança vn coup de poing, qui me fit saigner du nez, & vn autre se vouloit saisir de mon manteau, mais ie ne fus point de l'aduis de Ioseph, qui se trouua fort en peine de se l'auoir laissé oster par la Maistresse, ie le tins fort & ferme, quoy que deslors ie me iugeasse perdu : Et certes i'auois bien peur que si quelqu'un eust tiré l'espée, qu'il n'allasse faire vne sanglante tragedie : mais mon heure n'estoit pas encore venue, i'eschapay de leurs mains, & ne fus poursuiuy par apres que par quelques laquais, qui me ruèrent des pierres, iusques à ce que i'eusse enfilé la venele qui donne dans la ruë d'Orleans ou d'Anjou.

La necessité éueille les esprits & fait venir l'industrie. L'homme plus que tous les animaux est prudent, dit Aristote, quand il y va de son salut, la crainte luy donne de l'artifice, & quand il ne peut opposer la force à la force, il trouue des moyens de parer aux coups qu'il void venir. D'as le dessein de me sauuer & de conseruer ma vie, mon manteau, & mon argent, ie ne me voulus point engager plus auant dans cette petite ruë, où ie ne voyois personne pour me secourir, si mes ennemis m'eussent encores attaqué : ie retourne donc sur mes pas pour prendre le chemin vers la porte de Nesle, qui comme vous scauez n'est pas beaucoup esloignée de là, & apres auoir paré quelques coups de pierres, & essuyé la honte des broquarts qu'ils me jettoient parmi les cailloux, m'appellant Espion du Mazarin, du Mascarin, du Lazarin, du Marassin, ie me vis proche du Corps de Garde de la Porte, auquel i'auois mis toute l'esperance de mon salut, ie me sentis deslors plus fort que tous mes ennemis ensemble, & i'eusse desiré que quelqu'un m'eust poursuiuy, pour auoir raison du coup de poing qu'il me faschoit d'auoir receus sans rendre le change : ie m'arrestay quelque peu de temps, & ne voyant paroistre personne de ceux que i'attendois, fis ma retraite dans mon logis,



d'un costé, joyeux d'avoir eschapé le danger, & d'autre part, affligé de mon mauvais traitement; ie n'eus pas plusloft raconté mon histoire à mon hoste, qu'il me dit le mesme malheur avoir arriué à deux Gentils-hommes qui demeurent dans le voisinage, lesquels dans vne rencontre furent appelez *Mazarinistes* par quelqu'un qui ne leur vouloit point de bien, & ayans voulu mettre la main à l'espee pour se faire raison de l'affront, se virent entourez d'un grand nombre d'espees nuës, & eurent autant de peine d'eschaper que moy. D'autres personnes pour avoir dit, que c'estoit dommage d'avoir mis à sac le logis d'un Banquier de Mazarin se trouverent pierrez par des femmes & des petits enfans, crians aux *Mazarinistes*, & receurent pareille disgrâce.

Je finiray ce discours par un aduertissement salutaire touchant ce nom de *Mazariniste*; à sçavoir, qu'il y doit avoir quelque diablerie dans la chose, puis qu'il est si fatal au sujet auquel il est attribué, mesme par hazard, & par erreur. Ceux donc qui sont de ce party feront fort sagement de le quitter, s'ils ne veulent perir, ils pourroient bien porter le change à S. Germain du traitement que receurent les nostres à Charenton, les ennemis apres les avoir blesez les jettoient dans la riviere, disant: Vous irez voir le Parlement, & ceux de vostre party. Et pour ceux qui ne le sont pas, qu'ils se donnent bien garde de se jeter sur ceux qu'on appellera *Mazarinistes*, s'ils ne les connoissent, qu'on se contente de les arrester, & puis qu'on fasse enqueste: car de commencer le procez par l'exécution, outre qu'il y auroit de l'injustice, il arriueroit souvent qu'on feroit vne plus lourde & dangereuse, faute que ne font ceux qui prennent Marthe pour Renard.

F I N.